

॥ शान्ति-पञ्चकम् ॥

शं नो मि॒त्रः शं वरु॑णः। शं नो भव॑त्व॒र्य॒मा। शं न॒ इन्द्रो॑
बृ॒ह॒स्प॒तिः। शं नो वि॒ष्णु॑रुरु॒क्रमः। नमो॑ ब्रह्म॑णे। नम॑स्ते वा॒यो।
त्वमे॒व प्र॒त्यक्षं॑ ब्रह्मा॑सि। त्वमे॒व प्र॒त्यक्षं॑ ब्रह्म॑ वदिष्यामि। ऋ॒तं
वदि॑ष्यामि। स॒त्यं वदि॑ष्यामि। तन्मा॑मवतु। तद्व॒त्तार॑मवतु।
अव॑तु माम्। अव॑तु व॒त्तार॑म्। ॐ शान्तिः॒ शान्तिः॒ शान्तिः॑॥१॥

शं नो मि॒त्रः शं वरु॑णः। शं नो भव॑त्व॒र्य॒मा। शं न॒ इन्द्रो॑
बृ॒ह॒स्प॒तिः। शं नो वि॒ष्णु॑रुरु॒क्रमः। नमो॑ ब्रह्म॑णे। नम॑स्ते
वा॒यो। त्वमे॒व प्र॒त्यक्षं॑ ब्रह्मा॑सि। त्वमे॒व प्र॒त्यक्षं॑ ब्रह्म॑
वदि॑ष्यामि। ऋ॒तं वदि॑ष्यामि। स॒त्यं वदि॑ष्यामि। तन्मा॑मवतु।
तद्व॒त्तार॑मवतु। अव॑तु माम्। अव॑तु व॒त्तार॑म्। ॐ शान्तिः॒
शान्तिः॒ शान्तिः॑॥२॥

ॐ स॒ह ना॑ववतु। स॒ह नो॑ भुनक्तु। स॒ह वी॒र्यं॑ करवावहै।
ते॒ज॒स्वि ना॒वधी॑तमस्तु॒ मा वि॑द्विषा॒वहै॑। ॐ शान्तिः॒ शान्तिः॒
शान्तिः॑॥३॥

नमो॑ वा॒चे या चो॑दिता या चानु॑दिता तस्यै॑ वा॒चे नमो॑ नमो॑
वा॒चे नमो॑ वा॒चस्प॑तये नम॒ ऋषि॑भ्यो मन्त्र॑कृ॒द्भ्यो मन्त्र॑पति॒भ्यो
मा मा॑मृष॑यो मन्त्र॑कृ॒तो मन्त्र॑प॒तयः॑ परा॑दुर्मा॒हमृषी॑न्मन्त्र॑कृ॒तो
मन्त्र॑पती॒न्परा॑दां वैश्व॑दे॒वीं वाच॑मुद्यास॒ शि॒वाम॑द॒स्तां जुष्टा॑
दे॒वेभ्यः॑ शर्म॑ मे द्यौः शर्म॑ पृथि॒वी शर्म॑ विश्व॑मिदं जगत्।

शर्म॑ च॒न्द्रश्च॑ सूर्य॑श्च॒ शर्म॑ ब्रह्म॑प्रजाप॒ती। भू॒तं व॑दिष्ये॒ भुव॑नं
 वदिष्ये॒ तेजो॑ वदिष्ये॒ यशो॑ वदिष्ये॒ तपो॑ वदिष्ये॒ ब्रह्म॑ वदिष्ये
 स॒त्यं व॑दिष्ये॒ तस्मा॑ अ॒हमि॑दमु॒पस्तर॑णमु॒पस्तृ॑ण उप॒स्तर॑णं
 मे प्र॒जायै॑ पशू॒नां भू॑यादुप॒स्तर॑णम॒हं प्र॒जायै॑ पशू॒नां भू॑यासं
 प्राणा॑पानौ मृ॒त्योर्मा॑ पातुं प्राणा॑पानौ मा मा॑ हासिष्टं मधुं
 मनिष्ये॒ मधुं॑ जनिष्ये॒ मधुं॑ वक्ष्यामि॒ मधुं॑ वदिष्यामि॒ मधु॑मतीं
 दे॒वेभ्यो॑ वाचमु॒द्यास॑ शुश्रूषे॒ण्यां मनु॑ष्यै॒भ्यस्तं॑ मा॒ देवा॑ अवन्तु
 शो॒भायै॑ पि॒तरोऽनु॑मदन्तु। ॐ शान्तिः॒ शान्तिः॒ शान्तिः॑ ॥ ४ ॥
 ॐ तच्छुं॑ योरावृ॒णीमहे॑। गा॒तुं य॒ज्ञाय॑। गा॒तुं य॒ज्ञप॑तये। दैवीः॑
 स्व॒स्तिर॑स्तु नः। स्व॒स्तिर्मानु॑षेभ्यः। ऊ॒र्ध्वं जि॑गातु भेष॒जम्।
 शं नो॑ अस्तु द्वि॒पदे॑। शं चतु॑ष्पदे। ॐ शान्तिः॒ शान्तिः॒
 शान्तिः॑ ॥ ५ ॥